

啟者前其之報由本館送到寄到後請即將報費交付本館其由  
代派處送到者亦請將報費交代派處如報到後報費尚未交來  
下期即不再送以免虛糜此啟  
本館謹白

啟者時務日報館現已租定大馬路集賢里內  
即天保棧弄內俟機器寄  
到即定期出報此啟  
本館謹白

18

214

51



戊戌正月重定章程

- 一 本年之報因遇閏故加三期計起五十一期訖八十六期每分四元四角
- 一 代派處仍提二成作經理之費派報滙款在內不另索酒貨
- 一 直隸山東河南四川廣西每冊加寄費二分東三省山西陝西貴州每冊加寄費四分甘肅雲南每冊加寄費六分日本暨歐美各國又東南洋諸島每冊加寄費二分
- 一 現因須年清年款故概以定至本年年年底為止所有從前付十元看三年十兩看五年一條即行停止其前已定閱者即姑仍其舊
- 一 凡外地諸君願閱報者均請在本地代派處定閱不必來本館購取庶較便捷且免貽誤如無代派處則可寄費本館當即按期寄上
- 一 此後擬請各外埠代派處勿再將報零售本館亦不再零星寄出庶彼此易於核算兼免餘存各報有參差不齊之病若係本人失落願補購者本館當可通融惟須現付報費本館未便記帳
- 一 本館於應寄之報無不按期寄出閱者如屆時不接到即應早日函告本館若為日太久始行告知則本館已無從查究亦概不認賠
- 一 外埠閱報諸君如有曾在本地代派處定報一分而後遷居別處其報須另寄者

本館定章

昭和十九年  
一月十九日



本館告白

嘉興電報局

硤石萃古齋

湖州油車巷邱宅

寧波諸衙街餘岱鹽局

紹興水澄橋墨潤堂書坊

諸暨縣城金大成染坊

温州府城大街世司馬坊陳第

又府城大街時務書局

瑞安卓忠毅公祠內學計館

台州黃巖縣前柯泰豐

蘭溪電報局

福州城內三牧坊楊宅

泉州府城南門外閩海關科房

建甯電報局

廣州時務書局

又聖教書樓

又靖海門外鴻安棧

佛山舊橫榔街百元堂

潮州下水門中街陳再興紙行

桂林西華門兩粵廣仁善堂

梧州臨全大公堂

澳門知新報館

香港上環恆順泰

又海傍鴻安棧

新加坡鴻發棧

檳榔嶼嶺南棧

日本神戶均同茂泰

助款諸君姓氏續登 湘上漁人助賞一百元

本館告白 本館之東文譯編今年係請古城坦堂先生 貞吉 在家譯寄此文因譯

稿尙未寄到故暫行停印其俄文譯編係承上海李蘭舟先生 家塾 由海參崴寄

來故卽列入報內合并聲明

又 蘇州代派處侍其巷張公館現已退辦今年改託龍街墨林堂辦理又南京

代派處亦改託孝順里陳宅辦理 閱報諸君請向彼二處定購可也

時務報

本期附送大同譯書局書目

光緒二十四年正月廿一日

第五十一冊

THE CHINESE PROGRESS







如綫矣。猶復不思自振。禍亂將至。則補苴彌縫。以期苟安。及事之既平。又復晏然。爲燕雀之計。處堂以嬉矣。是以外侮間歲輒起。每起必喪師割地。日朘月削。而不復能國其國也。比者葦雷得阿比西尼亞之事。西方論者。以爲若在十年前。則土其必亡矣。今者歐洲諸雄。方併心注力於中國。無暇以餘力及區區之土。而土遂獲全焉。嗚呼。與土同病者。其危可知矣。而況於倚強盜以作腹心。引餓虎以同寢食。而尙欲以苟延旦夕。爲小朝廷者乎。嗚呼。吾願取湯君覺頓筆譯俄土之事。懸諸國門。以爲我四萬萬人告也。

### 論旨恭錄

十一月初一日奉 硃筆薛允升補授宗人府府丞欽此○初二日太常寺題十一月二十八日冬至大祀 天於 圓丘奉 旨朕親詣行禮四從壇遣鍾秀銘助德壽立瑞各分獻欽此○初三日奉 上諭奎俊著補授江蘇巡撫欽此○初五日奉 旨甘肅平慶涇固化道員缺著王會英補授廣西桂平梧鹽法道員缺著黃宗炎補授廣西灌陽縣知縣員缺著王宗沂補授俸滿貴州畢節縣訓導楊价藩著以教職用中書科筆帖式員缺著松印補授內閣侍讀學士員缺著呂海寰補授山東道監察御史員缺著楊深秀補授特旨送部引見直隸懷來縣教諭王煜著以知縣用監生駱懋勳著以同知用擬補內閣中書趙椿年張僧延李象寅俱准其補授升補順天北路同知沈宗蕃著准其升補保舉直隸補用知縣吳榮山東補用知縣龔叔政饒介祺王經燦河南補用知縣劉景昌福建補用知縣洪恩毓俱照例用卓異前陝西南鄭縣知縣任秉銓著准其卓異加一級仍註冊候升前山西蒲州府知府清樸著以同知用京察宗人府主事汪朝模著准其調補擬補 盛京兵部筆帖式音德琿著准其補授欽此○又奉 旨巡視南城事務著英壽去欽此○又奉 上諭前據御史宋伯魯奏中城地面商人王遠來賈玉楨被毒身死一案該城正指揮沈



塲等有商同諱匿捏供詳報情事當交刑部提案訊究旋據給事中丁之斌等奏刑部承審案濫刑株累復經添派都察院堂官會同刑部研訊茲據裕德等訊明覆奏此案王遠來賈玉楨據屍親供稱均係被煤燻死並無異詞張仲忻被參受賄勒索一節查無其事該御史未經送部徑行審結係遵照台規辦理尙無不合宋伯魯係得自風聞亦無挾嫌情事刑部司員承審此案因前後供詞不符是以用刑均著毋庸置議中城正指揮沈埔雖無與屍親等商同諱匿各情惟既經該城御史批駁未請別城會驗究屬疎忽著交部議處欽此○又奉 上諭步軍統領衙門奏遵保北營獲盜尤爲出力員弁懇恩獎勵一摺著兵部議奏欽此○又奉 上諭步軍統領衙門奏遵保南營獲盜尤爲出力員弁懇恩獎勵一摺著兵部議奏欽此○又奉 上諭步軍統領衙門奏拿獲迭次持械搶劫鄰境盜犯請交部審辦一摺所有拿獲之陳大卽陳名奎楊二卽楊汝淮小楊仔卽楊坤山王戎卽王四王二卽王浩巴尹六田五劉三李二卽李俊仔王得元卽王安樊思溫李二禿仔郭興卽郭淮等十三名著交刑部嚴行審訊按律懲辦未獲之周二賈宗汝等犯仍飭嚴緝務獲究辦原拿此案之文武員弁著俟刑部定案時聲明請旨該衙門知道欽此○初六日奉上諭巡視北城御史文博等奏遵保拿獲持械搶劫盜犯之司坊官紳懇恩獎勵

並遵駁改獎及請照原保給獎註冊各摺片著該部議奏單一摺三件併發欽此○又奉 上諭史念祖奏特參不安本分之道員請旨懲辦等語廣西試用道謝光綺居心巧詐招搖唆事並有自擬劄稿求委要差情事實屬荒謬謝光綺著卽行革職驅逐回籍不准逗遛該部知道欽此○初七日奉上諭史念祖奏知縣徵存錢糧銀米延不解繳請旨拿問監追查封家產備抵一摺廣西已革興安縣知縣卜永春任內已徵未解各年分正雜銀兩存倉米石爲數甚鉅迭經勒限嚴催仍未解繳殊屬延玩卜永春著卽行拿問監追仍提集經手丁書人等說明是侵是挪分別擬辦並著雲南巡撫將該革員原籍家產查封備抵其廣西寓所資財一併查封餘著照所議辦理該部知道欽此○初八日太常寺題冬至大祀 天於 圓丘視看牲隻奉 旨遣隆懃視牲許應駁看牲欽此○初九日奉上諭上年贍對番官越界滋事當諭令鹿傳霖秉公查辦以息爭端乃該番官膽敢抗違經鹿傳霖派兵勦辦並請收回其地原屬咎由自取朝廷因念該僧番等久受國家深仁厚澤豈竟自外生成恐鹿傳霖操之過蹙未足以折服其心特令鹿傳霖開缺派恭壽署理督篆諭令持平辦理茲據奏稱當鹿傳霖派兵進勦之時該番官等並非有意抗拒因見大兵臨境疑懼不敢投案憑寨固守鹿傳霖誤聽帶兵官一面之詞遂謂其叛

形昭著是以有改土歸流之議前據達賴喇嘛在理藩院呈請賞還地方并覽該署督此次所奏各節是該番官并無叛逆情事尙屬可信朝廷軫念僧番豈肯以跡近疑似遽行收回其地所有三瞻地方仍著一律賞給達賴喇嘛收管毋庸改土歸流該達賴喇嘛當仰體朝廷覆冒之仁知感知畏力圖自新即著慎選番官嚴加約束無得再有苛虐贍民侵擾鄰境情事致干罪戾其一切善後事宜著恭壽妥爲經理以期永遠相安至德爾格忒朱窩章谷巴塘裏塘各案仍著該署督悉心妥籌次第辦結另片奏鄂克什土司爭襲一案現據該署督將土婦釋放並派員前往懋功查辦亦尙中肯即著迅速辦結毋稍遲延欽此○又奉 硃筆稽查正紅旗滿洲旗務著榮陞去欽此○初十日奉 旨左翼監督著綿宜去右翼監督著奕功去欽此○又奉 上諭步軍統領衙門奏拿獲偷竊官廟佛金人犯請交部審辦一摺所有拿獲之高四侯振明姜成義郝得林徐二等五名著交刑部審明辦理欽此○十一日奉 上諭步軍統領衙門奏拿獲搶奪看管人犯拆毀官廳毆傷官員之宗室等請交刑部會同宗人府嚴訊一摺所有拿獲之宗室載燾載霖劉三黑即劉三夏三即夏清德等四名著交刑部會同宗人府審明辦理未獲之小常等犯仍飭嚴緝務獲究辦另片奏輔國公溥釗以族叔載輝等被人搶毆出具門文查詢等語著該衙門

歸案一併查辦欽此○又奉 上諭松椿奏霜降安瀾一摺本年伏秋汛內大雨兼旬湖河並漲經松椿督飭在工各員將重灘南關新壩陸續開放設法搶修現在節逾霜降工穩瀾安仰賴 神靈默佑實深寅感著發去大藏香十五枝交松椿祇領敬謹致祭以答 神庥餘著照所議辦理該部知道欽此○又奉 上諭王毓藻奏特參文武不職各員請分別降黜一摺貴州思甯府知府保謙昏懦無能著即行開缺試用通判施澤廣習慣荒唐著以縣丞降補正安州知州李上珍獨山州知州伍恩桂縱差毒民署荔波縣方村縣丞田書文試用州吏目劉樹謙不知檢束補用副將夏魁元罷輒不振補用副將馬定邦師行騷擾均著即行革職以肅官方候補知府吳厚恩陳善藩不惜聲名均著驅逐回籍至摺內所參餘慶縣知縣劉鈞貪黷無厭其應如何懲處之處何以漏未聲敘著王毓藻明白回奏餘著照所議辦理該部知道欽此○又奉 上諭崇歡奏假期屆滿病仍未痊懇請開缺一摺烏里雅蘇台將軍崇歡著准其開缺回旗欽此○十三日奉 旨烏里雅蘇台將軍著貴恆補授欽此○十四日奉 上諭廣東高廉欽道員缺著吉順補授欽此○又奉 上諭直隸宣化鎮總兵員缺著陳飛熊補授欽此○又奉 上諭工部奏 東陵應修各工請派員承修一摺著派溥善壽昌敬謹承修餘著照所議辦理欽此○又奉 上諭

廣西恩恩府知府員缺著成慶補授欽此○又奉 上諭長萃等奏家人勒索花戶牽涉言官據實陳明一摺本年八九月間太平倉兩次採買還倉米石拉運出城時有稽查俸甲米御史寶安家人孫二劉二勒索花戶銀兩情事此案現在步軍統領衙門質訊請飭送部究辦等語所有此案人證著該衙門解交刑部澈底根究按律懲辦花戶金糧量一併送部審訊御史寶安著聽候傳質欽此○又奉 旨四川成都副都統著恩存補授欽此○十五日奉 上諭連順奏漢山祭饗木亭將就傾圮請籌款興修一摺庫倫迤南漢山禱雨祈晴素著靈應祭饗木亭年久失修即著連順籌集款項選派委員前往監修以肅祀典餘著照所議辦理該衙門知道欽此○又奉 硃筆李紱藻補授詹事府詹事欽此

新疆巡撫陶覆陳自強大計摺乙未年

奏為遵 旨覆奏恭摺馳陳仰祈 聖鑒事竊臣於光緒二十一年七月十五日承准軍機大臣字寄光緒二十一年閏五月二十七日欽奉 上諭自來求治之道必當因時制宜況當國事艱難尤要上下一心圖自強而弭隱患朕宵旰憂勤懲前毖後惟以蠲除痼習力行實政為先查據中外臣工條陳時務詳加披覽採擇施行如修鐵路鑄鈔幣造機器開礦產折南漕減兵額創郵政練陸軍整海軍立學堂大抵

以籌餉練兵為急務以恤商惠工為本源皆應及時舉辦至整頓釐金嚴核關稅稽察荒田汰除冗員各節但能破除情面實力講求必于國計民生兩有裨益著各直省將軍督撫將以上諸條各就本省情形與藩臬兩司暨各地方官悉心籌畫酌度辦法限交到一月內分晰復奏當此創鉅痛深之日正我君臣卧薪嘗膽之時各將軍督撫受恩深重具有天良諒不至畏難苟安空言塞責原摺片均著鈔給閱看將此由四百里各諭令知之欽此等因伏念臣以菲材受 恩最渥值此時勢艱虞何敢不殫竭愚忱以冀涓埃裨補惟是新疆情形與內地不同戈壁荒寒無多物產俄商既未權稅如僅權華商則影射生端徒滋轉轄是以臣於光緒十八年奏准將土貨釐金概行裁免是新疆並無釐金可徵營制雖改防為標而一切章程仍照營勇辦法新疆孤懸塞外幅員萬里平日已不敷分布近因甘回叛亂調兵分防哈密西安肅州等處不得不暫時添募應俟回匪平定後酌量裁減是新疆目前尚無可裁之兵夫議裁綠營亦以其狃於積習耳自光緒十九年調派洋操教習西來臣督飭各營依次習練雖未能悉改舊章而運用槍礮諸法弁勇間有領悟惟火器不能一律亦勢使之然向來綠營參用鳥槍不多近來湘楚各軍火器不過三四成耗費已增於舊若概用後膛新械固將弁所甚願惟操演槍礮所需藥彈及修理各費又將倍

徒平日限於財力。臨時安得不拉雜購用。艱難情形。不獨新疆爲然也。和闐金礦。暨迪化溫宿銅鐵諸礦。前撫臣及臣先後勘採。祇因礦學乏人。沙漠長途。轉運薪糧。所費尤鉅。歷年虧累。無從報銷。光緒十九年十二月奉 上諭商辦和闐金礦。遵卽會同陝甘督臣楊昌濬。札委嘉峪關洋弁比利時國人。遊擊銜林輔臣。候選巡檢施再萌。裏糧往勘。從羅布淖爾以南。縱橫二千餘里。曠無人烟。山谷幽邃。察看稽遲。疊據稟報。尙無端緒。容候該委員等回省。詳詢情形。再行復奏。新疆屯墾。自安插遣犯。招徠流氓。厚給牛工籽種。爲款頗鉅。乃旋墾旋逃。迄無成效。良由農事最苦。非退卒遊民所樂爲。嗣後惟有責成地方官。加意撫循。招徠土戶。逐漸墾闢。寬定升科年限。務期歲有加增。惟地曠人稀。非剋期所能奏效。臣復詳閱大學士徐桐廣西按察使胡燏棻等各條奏。或意在剔除時弊。或意在步武泰西。言之極爲懇切。世變日棘。非更法無以自強。臣於本年五月十一日。具奏培養人才。勉圖補救一摺。意亦同此。第更法非難。更法而無弊爲難。今日帑藏空竭。豈容以羅掘之餘。輕率從事。夫不知我之所以失者。不足與語彼之所以得也。不懲既往之弊者。不足與語將來之利也。臣謹就諸臣所奏各條。推廣其意。約舉四端。一曰核實用財。伏讀 上諭卧薪嘗膽等語。凡在臣下。敢不激發天良。於艱難困苦中。屏絕浮華。力行實政。以仰副我 皇上宵

旰憂勤至意。臣聞西人豐於實事。儉於浮文。雖官府儀衛。亦甚簡畧。華人辦理洋務。他無所得。而侈靡先之。各局總辦提調委員。或要津屬托。或親故攀援。虛領薪資。徒滋弊竇。目前如諸臣所奏。將鐵路開礦諸政。一一舉行。恐閒員遊士。濫廁其間。更不知伊於胡底。自後各項人員。應請先後考核。事非素習。毋許濫竽。浮冒開支。概行刪汰。庶費不虛擲。效可漸收矣。一曰破格儲才。算藝取士。應加額分科。水陸學生。必兼通文武。出洋人員。宜如何端品。而矢忠愛之忱。奉使大臣。宜如何稽察。而任考試之責。不拘文武。惟視所能。臣前摺亦經詳細陳明。曩時出洋學生。可用者亦多。祇以拘於資格。令素未諳習之員。駕乎其上。全局因之不振。嗣後水陸將弁。不諳各國兵法者。各局所監督委員。不諳製造各學者。皆當逐漸更易。卽以優等學生充之。舊例武科。無裨軍事。徒害鄉閭。急當罷行。斷不可改習火器。致滋流弊。西人弁兵之長。在明於製器用器之理。及兵法輿地各書。必須入學堂肄業。師友觀摩。並非但知施放槍礮已也。草野武夫。既乏新書奇器。又不便聚徒講貫。性情稚魯。難習韜鈴。今議者欲改試槍礮。勢必家置火器。後患更難設想。應於沿江沿海。設立武備水師學堂。卽以此爲武學。秀才舉人。於此拔之。都守千把。於此取之。果能實力栽培。分布各處。足敷千城之用。西北諸省。無庸徧設武學。至於各項武備工藝。考試優劣。苦無深通此事

之大臣以爲試官。閱進士康有爲所陳近支王公妙年英邁者。宜令入學堂學習。洵爲儲才要計。臣以爲既學洋務。在華不若出洋。地遠誼疏。則瞻徇少。見多識廣。則學業精。此卽各國致強之本。應卽請旨辦理。以爲士民表率。一日推行宜漸。論時事者。急求富強。然理財當靜。不當擾。農商二業。疲困已極。取民之數。無可再增。臣生長江浙之間。釐金最旺之地。目擊商民由富而貧。以至於赤貧。皆由釐金累之。委員司巡。稍不如意。卽指爲偷漏。勒罰十倍至二三十倍不等。若輩囊橐。得自侵匿者多。得自勒罰者亦不少。今議者欲盡括此數爲公家應得之款。並以收數最鉅之年爲定額。抑知正項既增。委員司巡之私入能禁乎。立法從寬。尙流於刻。如此不留餘地。名爲惠商。實則病商。議者又欲以比較數目。按月報部。不知胥吏以報部爲良法。外官視報部爲弊政。往年戶部所定錢糧徵信冊之類。汗牛充棟。孰能檢閱。外官慮受駁斥。或賄吏胥。以求省事。前大學士閻敬銘致仕還家。深知其非。釐金繁瑣。若亦如此辦理。徒爲吏胥增一利藪。爲小民加一番剝削耳。天下合例之案卷日多。天下守法之廉吏日少。其弊可以想見。夫良民孰不畏官。但願無留難需索。本自樂輸。商人每業皆有首領。市廛每歲出納貨物。成本若干。應稅若干。人所共知。或令公舉一二正人。在會館包繳釐金。一切局卡委員浮費叢弊。似可悉除。惟各處情形不同。應由地

方官斟酌辦理。至於開墾荒地。亦難急切。民果見利。無勞督促。廢地不墾。自有苦衷。如江蘇之吳江震澤。往往富人視田爲累。甘心送人。他處更可類推。經理墾荒。有司之責。若考成太嚴。猾者必借此邀功。以荒報熟。曩年陝西延安綏德鄜州各屬。曾有此弊。累民殊甚。要之事不通籌。動多窒礙。司農歲入。較之於古。未嘗不富。然民氣漸凋。度支日絀。嘉慶道光年間。已有銀荒之患。各國通商後。每歲漏卮數千萬。中國銀根已竭。無論如何整頓擴充。斷未能一時復原。紛紛立法。謀利愈急。累民愈甚。欲無累民。舍開礦無他術。然自辦則虧折立見。延洋員則駕馭殊難。急宜於京師及濱臨江海之區。設立礦務學堂。加意講求。礦學已明。派赴各國礦廠。閱歷考證。然後還勘各省五金諸礦。一一開採。庶有實效。人人知寶藏自在。不藉搜括。民心亦可稍安。人才得地利興。方有成本。以行鈔鑄幣。方可自設製造各廠。能自製造。方可將兵器歸於一律。方可令鐵軌鋼艦左宜右有。若不按次序。雜然並興。果有富人承辦。固善。否則專恃借貸。勢必利歸人而害仍在已。不可不深長思也。一日根本宜急。臣按大學先論本末。後言生財。終斥務財用之非。孟子先仁義而後利。使孔孟再生。必議變法。必不專言富強。夫有弊當革。有利當興。不求富強。而富強自致。是謂王道。急欲富強。而競謀功利。是謂雜霸。朝野上下。堂堂言利。北宋之覆轍宜懲。憂貧而勤繭絲。同舟

且成敵國。違論海外。臣非阻撓洋務者也。竊意更張不可少緩。而根本急宜先治。根本莫要於取士用人。人才之所以不振。皆由考試太濫。捐納太廣。保舉太多。名成年長。境窮志污。教無從教。効不勝効。日日言破除情面。而終無由破除。日日言實事求是。而終不得實效。此病根之所在也。不治病根。但學西法。聚鬪茸嗜利之輩。以期富強。祇於舊法外增一法。不得謂之變法。且於積習外增一積習。不得謂之祛積習。夫東西洋各國之所以自立者。在法亦在人。試令各國亦學我之取士用人。則彼所謂富強。不過四五年。而衰弱矣。又試令島族納土歸誠。取其已富之財。已強之兵。令我鬪茸嗜利之輩往治之。不過一二年。而弊端百出矣。今日之敗。釀之已久。癰瘍已發。難治更危。當靜察其病所由來。求對病之藥。庶可療根解毒。而徐收其效。我皇上懲前毖後。以蠲除痼習。力行實政為先。誠大有為之機也。臣竊謂天下有漢以來之痼習。納資得官是也。有唐以來之痼習。詩賦取士是也。昔程子以館閣清選為名實未正。以增設解額為利誘之法。朱子論科舉之弊。其說尤多。甚至謂若要恢復。須罷三十年科舉。蓋庠序之教宜廣。而選舉之制貴嚴。今濫取濫保。名為得士。實則害政。捐班則況而愈下。捐至於武職。更無論矣。今年不能停止。則明年。明年不能則後年。捐班之弊。實較洋債為重。各省匪類日滋。甚或猖狂叛逆。豈盡民之無良。大半由官

吏激成之。官吏豈樂為不肖。大都由學術未正。仕途擁擠。釀成之多。取一游士。即多傷一分元氣。每年收百餘萬之捐費。將來即償以千百倍之脂膏。輿言及此。能弗寒心。急宜抑其浮囂。歸之農畝。停止分發一二十年。官少政清。得良有司。以撫民。則黎庶悉敦本業。得良有司。以弭盜。則營勇亦可議裁。至於農桑諸務。西人皆設學講求。而華人概從鹵莽。此亦根本所當急者。臣反復籌思。竊以為欲求富強。必以崇節儉。廣教化。恤農商為先。欲新政治。必以變士習。減中額。汰內外冗官為先。伏乞 皇上宸衷獨斷。於根本之病。先行清理。然後安內攘外之策。綱舉目張矣。微臣迂謬之識。非敢故為高論。誠恐急切近利。效未見而害更大。因與布政使臣饒應祺。鎮迪道兼按察使銜臣丁振鐸。再三商榷。意見相同。謹恭摺覆奏。是否有當。伏乞 皇上聖鑒訓示。謹 奏。

浙江蠶學館招考章程

一 蠶學館之設。以考驗蠶種。分方做子為第一要義。驗有成效。館中製成蠶子紙。售與內地養蠶之人。其他飼蠶種桑等法。亦詳細講求。大旨取康發達成法。參以中法。以裨蠶病。康氏之書。已分刊農學報內。

一本館先在杭州西湖金沙港。建屋購器。試辦二年。俟有成效。再行推廣辦理。

一學生定額二十名。無論學童。有能家世業。文理通順。年在二十左右。明敏篤靜者。准其報名投考。文字雖佳。考取後。要面問養蠶成法。以定去留。惟短視人於顯微鏡不相宜。

一本館定於光緒二十四年開印日起。二月初十日止。由該生親赴本館。開具三代年貌籍貫。并取其紳士切實保結。省城外郡皆自請當地紳士。不必限。定達官凡舉。實有聲望者。俱可出結。限二月十一日。一律到杭。聽候示期考試。

一在館諸生。必遵館中所定課程規條。盡心學習。另有詳細條目。報名時來館取閱。三年以內。或留館。或派往鄉鎮。須聽館中調度。不得任意告退。違者著保人追繳館費。期滿以後。學生有應得利益。如製賣蠶子紙之類。由本館察看。給憑給截。為據。

一學生按月仍給例假四日。惟蠶事既興。日有日班。夜有夜班。假期須隨時酌定。若無故不到班。並請假違例者。按日扣除月費。館中列一請假月日表。即以所扣之款。為勤奮者獎款。此外非疾病大故。不得請假。均載在另定條目內。

一館中每一房間。住學生兩名。每名備有一牀一案兩櫈。此外來往盤費。並鋪蓋燈油。一切應用之物。由各生自備。館中供給各生伙食外。按月給雜費洋三元。

西文譯編

湘鄉曾廣銓譯

中國時務

中國講求西學論

通商之後。中外一家。我西人不憚脩阻。航海遠來。凡平日耳之所聞。目之所見。無非考證之資。於是有舉其所知。致書本報曰。中國幅員之廣。黎庶之多。足為地球首屈一指。核其品類。大約有二。曰官。曰商。顧官之氣體雖崇。而貪婪者多。隱微每有不可問之處。商之執業雖卑。而立心正大。信義實足為各國之冠。夫均是人焉。而心術不同。若此。豈不甚奇。此外更有不解者。衙署之中。一應服役之人。悉以至貧苦者當之。其意無非因發給官價。可以從廉。然若輩馳驅風雨。出入不遑。所得僅有區區。內既不足贍家。外亦無以自給。如此而欲其屏除賄賂。自矢清廉。焉可得哉。嗟乎。小之不屑。大更可知。下既如斯。上復何望。此中國之所以難期振作也。日本則不然。深知各國和約。不利於彼。於是一意自強。痛除積弊。一切政治。悉仿泰西。而其官場大員。尤能廉介自持。一應軍國大事。無不精益求精。以期有濟。雖各商人。或有甘居卑賤。欺詐百出。深為本國武員所鄙棄。然有各當道崇奉西學。革改從新。區區商民。似無關於輕重也。

中國學優而仕之人居恆推崇孔教鄙西學爲不足道其意蓋欲拘守古人之書以爲圖治天下之本自鐵路電報汽車汽船盛行之後始知古人並未有言西學大可仿效百人中遂有一二人改談洋務津津樂道然其勢尙孤不足有爲試觀目前中國政府即可知矣

最可怪者墨守孔學之士子縱遇西國絕妙技藝必力爭爲古書所已有及進而考究其極則又諉謂失傳模糊影響習爲固然雖欲不僨事安可得哉至歷任恭膺使命之員皆選之於詞林之內置身通顯既由遵守孔教而來於是存心詆毀掩飾爲能及回國之時又深恐爲人指摘不得不棄長錄短以明其未嘗忘本之心夫以文人之筆爲痛詆西學之具雖使千言日試亦有何難而中國億萬兆之志氣聰明悉爲之錮蔽而不能一醒其迷不亦重可惜哉今者聞所選英美欽使不必曾任詞臣惟以能習泰西語言文字爲主或者轉移風氣在此一舉他時任滿歸來採取一二端以爲提挈之助此則我西人所甚願也

一千八百六十二年中國國家開設同文館招人肄業因一千八百六十年中英訂立和約有從換約日起三年以內凡英國文書必附漢文譯篇一道而中國亦應預備翻譯官若干員以便交涉之事故也今同文館尙設於京師專教英法德俄等國文學及各種西學算學至一千八百八十年南京福州廣東省城前後亦各擬立同文各館祇以事權不屬功課未專遂致歲糜巨款收效甚微目前各省大員除代理巴黎使務之員曾在同文習業外其餘欲求其善操西語熟諳洋文者實屬寥寥無幾也

一千八百七十二年容闈親領學生一百二十人前赴美國肄業所需資斧由國家措辦首尾八年始行回國無如各學生沾染洋習太深一應舉動反與中國枘鑿致難委用也

自中國以時文取士定鄉會考試之法士子用心不爲不專可惜空言無補於國計民生之要判若兩途向例文三篇詩一首連中兩次即可得官三年一科投考者每省或一萬人至二萬人不等以天下十九省計之文則八股武則弓矢大約四兆人之中額則百五十人內一人其未中式者須待三年再考以故嘗有終身未得一第老死牖下之人夫人生天壤大則爲國小則爲家各有專責從未有中國士子之無益於人有害於己宛若贅疣之可去也奇矣

以中國數百兆之人民概用文詩取用宰相督撫布政按察等官每年實不知耗費幾許心思埋沒幾許英豪此外女學既全無教法商農各務又毫無推求而立國尙



能至於今日。我西國亦有不得不爲之欽佩也。

中日兵燹以來。日本因揣求西法。故得轉敗爲勝。中國因拘守舊章。故反似強實弱。雖然。我竊爲中國幸焉。中國積習之深。非口舌所能挽救。自有此役。創鉅痛深。方克幡然改志。一念維新。各省擬立學堂。培植人材。此後能否堅忍不變。持之以恆。要難預必。然草野之風氣既開。國家之提倡當先。似宜即日設一文教部。酌請西人品學俱優者一二人。參贊其事。其學堂則專門考察電學及機器農礦等科。一面更推廣鐵路。令十八省。均各通商。行有餘力。再踵求醫學。各門專學。律法。理學。經濟。並西國史學文章。務使無一偏廢。於此而謂中國仍不富強。未之有也。

中國之字。頗難識認。如能用北京官語。參以西字。編成字母新書。再以新書繙譯西書。頒發各處學堂熟習。則裨益實無窮盡。至開女學。當永禁纏足。考功課。當上海添開總學堂。所有考試之法。須合英俄德日美五國學堂功課單。去短錄長。酌立一單。以爲定式。其考中者。卽行舉用。如是數年。必出奇才。惟此等學堂。國家必爲設法保護。庶得鼓舞勸勵之意。

當開辦之先。中廷當派員赴日本。察看大小學校規模。兼考驗製造商務等學堂章程。以爲先導。中日同爲亞洲大國。本有唇齒輔車之誼。日本目下亦深悔前非。願言結好。此舉如成。則以文會友。聯絡自深。日廷必能從優款待。樂於成事也。

中國皇上。倘因此再能勒令宗人府及各旗兵丁。一律講求西學。如前從事。則大清國之風氣。亦必蒸蒸日上。外侮無虞矣。以上英國亞細亞洲四季報西一千八百九十八年一月

### 彙譯各報述膠事

爲德人謀萬全之計。自當以久占膠州爲第一策。然德人此際運籌決策。要亦頗費躊躇也。何則。德皇之意。本欲籌添水師。而通國之民。無有樂輸軍費者。故德皇又欲借端膠州。開罪各國。以期用兵。如此則添募有名。集資自易。此目前德皇所以遇事驕傲。一意矜張也。雖然。此等舉動。亦非計之得者。蓋以今日天下之視德。遠不如從前俾思麥當權之時。卽其本國部民亦然。萬一事機不成。騎虎難下。豈不徒貽各國笑柄哉。太晤士報西十一月二十三號

英國每日報云。目前時局。不必他求。但視德人能否在亞細亞洲進步耳。倘德人果獲增添水師。如願而償。則法國首當顧慮。何則。德國軍勢陸強。非法之利。而俄國將來可否爲法助力。亦難預定。此外卽地球各國。亦孰不視德人之成敗爲進退哉。

柏靈訪事人來函。謂德國報載論膠事云。英國目前。實無妙策。足以阻梗德人。要惟

有德惠日本居中國擾亂耳。然日本雖有英人臂助，恐亦難與俄德抗衡。況今年底德艦之駛赴中國者衆，日人自知力弱，愈不敢貿然開釁。此外法國心雖不甘，然亦無可如何，祇能旁觀而已。

又云：德皇現已不言膠事，下禮拜開院議事，德皇宣言亦僅爲保護身家起見。至德皇之弟太子亨禮，在亞丁歌浪波新加坡三處停泊，大約須西曆正月終抵膠，其行期間以一年爲限。以上太晤士報西十一月廿五號

德人據膠爲屯煤之用，德國新聞報曾屢著論說，極力宣揚，以冀鼓舞黎庶志氣，俾德皇籌添水軍之舉，得以如願而償。萬不料蚩蚩者之痛癢，不相關一任言者之諄諄無已也。此等用意，實與我英皇從前經營香港一事，暗相照合。故我等正如游夏莫讚一詞，雖然膠爲德占，而占膠之費，反出自中國，其事理之奇，真令人無從索解。回憶一千八百七十一年，普法罷戰之餘，有兩省爲普割據，普於斯時亦曾列款向法需索占省之費，爲數甚巨，殆即德人前事之師耶。

德國既占膠州之後，中國作何舉動，於我等無關利害，可以從緩推求。所要者俄日兩國之情形，爲我英人所當加意詳察也。據外間傳說，俄德已有約言，此言不爲無見，蓋不如是則卧榻之旁，豈容他人鼾睡。俄人早當向之梗阻，毋許一刻停留矣。前二日間更有奇聞，如俄新聞紙載謂德既占膠，俄英法亦當設法分割中國口岸，俾得勢均力敵，各無偏枯。夫前一年英國報曾言中俄已有密約，內一款即係膠州讓與俄國，惟暫時不必據有，免啟各國之疑。今觀俄報，則此密約竟令人難揣其有無矣。何則？此約如立，俄人應早知膠口之關係甚大，而斷不肯視如無事也。

日本重視膠州，亦目前時局所應有之顧慮。倘德國藐視日本，以其小而忽之，則立意左而用計疎，何則？日人縱使力薄，未敢遽行開釁，然心旣不甘，將來終有掣肘之處也。太晤士報西十一月三十號

德皇添募水師，將來作何應用，觀此次與中交涉情形，亦可見一斑矣。夫德教士之被戕，祇有二人，較之英法等國教士受害之多，相去懸殊。然英法歷來除索賠撫卹科治兇犯二項外，別無要挾。德則造教堂，開鐵路，暨占口屯煤，所得利益十倍各國。倘德皇加增水師之後，挾其故智，出與各國爭衡，爲害將無底止。雖然，德皇此次舉動以爲保護商務，非此不辦，則凡各國之保護商務者，又孰不知籌添兵勢哉。況英國商務之分布中國，大於德者六倍，亦將因此六倍其軍而後已。德亦枉用其謀矣。

美國每日報西十二月三號

邇來香港上海時有謠傳謂德法俄三國聯盟瓜分中土大約未必實有其事但德既占膠於日本殊不方便日本應作何舉動即可視日本之力量矣英國每日

報西十二  
月三號

聖彼得堡路透訪事人於本月三號專電云俄新聞紙頗不以德人占膠之事為然蓋因其大傷俄國東方之民俄政府應勒令德人即行退讓否則亦當向索賠款俄官場雖無言論而大半皆以德人未能久占太晤士報西十二月四號

日本於膠州之事最為留意自戒害教士起至德人占地止一切情形推論甚詳大致以英國占據別國土地亦儘有違背公法之處然從無兵釁未開遽先奪地之舉今德人並無顧忌決然有此舉動誰謂能辭其咎哉日本郵信報西十二月二十三號

香港每日報載太晤士報論膠州事云目前中國政府於辦理膠州之事如再仍前玩忽不思振作精神必致不可收拾而後已蓋昔年歐洲各國無侵占中土之權故縱事權不一賄賂公行尚不致於瓦解今既時移世異各國之憑權藉勢者均相逼而來則中國自當以變計為第一義然此事在別國不難即日改圖在中國仍恐不能期望耳

又云目前世變已亟我英國亦當設法保護商務為是顧我國外外部大臣素以中國

為教化之邦一應交涉事件均以和平商訂從無威迫之心即至今此或猶不能解雖近來變態百出每以失望之故漸知醒悟然不就此早為更張亦終必不可救藥耳以上北中國每日報西一月四號

英國派爾買爾報論德人占膠一事其用意所在不獨別國無從揣量即德國自有之報紙亦不過就事論事不甚了了也蓋除藉端占地之外與戕害教士已渺不相涉夫平常各國教士之僑寓中土者遇有交涉事件其本國政府已屬厭聞一旦肇禍所有辦理為難之處實與中國相彷彿此次德廷則異是方將借此為威脅之計所幸中國不欲遽傷友誼雖奪地要賄總總實偏處此惟有一味退讓以全大局未必終於決裂然德皇如果僅為索款起見非特事可早了即德新聞紙邇來論說亦應以教士被戕為主乃何以絕不一言視如無事然則欲知德皇之意正不妨為之代答曰一則膠灣為大好船澳欲思捷足先登一則本意欲籌添水軍故特乘機開

隙北中國每日報西一月五號

中國允將膠州租與德人其地面係從膠口直至內地周圍各二十英里合共四百方英里北中國每日報西一月七號

英國某報紙論膠事云德皇藉故占據膠州實為籌添水師起見然既占之後得尺

則尺未免又有久假不歸之意。所慮者俄人阻梗耳。顧俄雖阻梗，德人亦必設法要求中國，改換別省口岸。聞德皇之子均在沖齡，未能獨攬大權。一旦德皇有變，其位必傳之皇弟。此德皇督率水軍之權，不屬之外人，而必委之皇弟亨禮。蓋有深意存焉。所派赴華之兵，為數不為不多，其先已經德皇密與歐羅巴各國議有成言。其中俄國頗敦友誼，並不留難。法國即不以為然，深恐德人於中土得有進步，則勢必加兵。兵多勢銳，法實有心腹之虞也。北中國每日報  
西正月十號

又謂此次德皇添軍之事，雖有膠州可以藉口，然能否勸令通國之民咸樂輸款，以濟軍需，正尙未定。目前德民深知添軍之舉，所費不貲，雖此事係為保護中國商務，所必不可緩，而將來商務能否得賺利益，既不可以預料，即賺矣，其一切利益亦祇富商承受，豈能挨戶皆得，故甯坐視觀望，相約不前也。況舉德國已有之師，為保守本國自有之利，綽乎餘裕，則其他要非所知耳。北中國每日報  
西一月十號

派爾買爾報謂德皇占膠之後，一切辦理情形，頗為掣肘。良以事關交涉，非一家一國之私，雖中國積弱之勢已成，不妨任情挾制，惟所欲為，而環顧地球大國，如英、俄、日之勢力相同者，孰不眈眈窺伺，使運籌稍懈，即難免起而有言矣。日前德新聞紙語意似乎俄國已經接洽，日本無足重輕，英國未嘗允從，抑知非也。英人

本擅香港之利，德之占膠與否，與伊無礙，尙可毋庸介意。至俄則雖有路透電謂其並無扶助中國之心，然俄非真作壁上觀，大都因利害未明，故尙遲疑不決。恐一經剖析，即將首與發難。日本此際，雖亦默不一言，而其振興武備，一意自強，要亦未可小覷。總之窺德皇之隱，其滿志躊躇者，無非因籌添水師耳。設一旦如數招齊，自當退步不遑，故目前各國即有留難者，德皇正不妨宣明衷曲，以示無他也。北中國每日報

西一月十號

英國地球報謂膠州戕害教士二人，德廷遂向中國列款索賠，所定數目，似覺太巨。如我英廷歷來亦照此索款，則中土所有行省，已早隸為英屬，乃六款之中，又有欲在該省建立之教堂，此何要事，而亦列入，未免跡近遊戲。至中國允許各款內，如查辦兇犯及該管官長，本有應得之罪，不難照律定擬。山東巡撫雖有革職處分，將來仍可簡放別省，較之該省，尤能安善，亦未可知。然此皆不足深論也。所要者，專山東鐵路之全利，開膠州停留之口岸，是則德人之真意，無非欲藉口教士，以為要求之勝算耳。但此等要求，除鐵路外，德人不能擅有，固與我等有益，即果擅有，似亦與我等所失甚微。何則？鐵路一成，不獨該省商務即可由本口而出，無庸紆道天津，而其一應內地通行之利，皆非英有，其有傷英國商務，豈少也哉。北中國每日報

日報西一  
月十號

路透來電。德人租膠九十九年。並離膠周圍三十英里。中國允與德人全權。不知德人既得之後。一應事件。作何開辦。然德廷如能與在華之德人會議商酌。則開通口岸。是必與香港上海相同矣。北中國每日報  
西正月十號

中國出使德國欽差呂大臣。海寰於本月六號。已抵相靈。七號即晉謁德皇。呈遞國書畢。午後當與德國外部大臣商議膠事。約歷數下鐘之久。北中國每日報  
西正月十號

日本郵報云。如膠州作為通商口岸。德國不能獨擅權利。因歷來中外各國條約所載。皆有利益均霑之言。及彼此須按最優之國禮相待云。北中國每日報  
西一月十九號

正月三號。巴黎來電云。有在山東之德教士。稟知駐京德使海大臣。請以山東提督又有畏迫情事。因此海大臣向總署申說。勒令於禮拜四前。將該提督撤任。否則海大臣即欲出京。北中國每日報  
西一月二十號

正月四號。巴黎電云。德國又派接濟之兵。來至中國。而總理衙門已將山東提督撤回。北中國每日報  
西一月二十號

香港每日報。接到奧大利亞來電云。俄國外部。曾咨照俄國各新聞紙。凡論德占膠

事。不得有非之之語。北中國每日報  
西一月廿一號

蘇州臬臺聶方伯。緝渠前曾任江海關道。已於今日由蘇抵滬。聞係奉旨派來款接德太子者。北中國每日報  
西一月二十六號

禮拜六北京來電云。膠灣之事。中國政府。已與德使商定。由中國政府賠兵費銀廿四萬兩。被戕之教士二名。另賠恤款。其地面自青島起算。直至內地一百里。租與德國五十年。北中國每日報  
西一月二十六號

萬國地球報論膠事云。俄國出為調停中德之事。本無所畏懼。惟深願別國出場。俾伊可以少鬆。俄國各新聞紙。均言此事有損英美兩國體勢。將來此兩國必不能允。然至今兩國並無留難之言。以意揣之。各國未必久甘退讓。終有人出為責備也。北中國每日報  
西一月廿七號

昨日上海傳言。謂膠州有巡查德兵。被人將頭割去。大約係本處土匪所為。然恐係謠傳。不知究竟若何也。北中國每日報  
西一月二十六號

本地新聞紙云。自上月至今。駐紮膠地防守之德兵。已被本地土匪戕斃三名。惟此等土匪。均在德人所轄境內。中國駐膠之官。均不認失察之咎也。北中國每日報  
西一月廿八號

俄國水陸各隊近來軍情

閱今日日本新聞紙所載有二事甚奇。一謂俄羅斯已早蓄心謀占旅順口。故上禮拜長崎有俄兵艦九艘。同時開出。不言去所。長崎縣知事得信後。當即電告日本政府。至禮拜六。東京即接北京來信云。旅順口外。忽來俄艦多艘。人心頗為震動。未幾又電云。該口已為俄人占據。作為屯船之所。斯時並接到外路電報多處。皆如此言。於是日本招齊政府議事。其情形緊急。實與年前退還遼東相同。昨日各部院尚書。又與首相前往計議。山縣侯本擬即日回西京度歲。因此亦不果行。一謂法廷行文日廷。欲借日本澎湖屬島。為法水師停頓之所。然此事以意揣之。定屬謠傳。必非實有其事。神戶西字報西十二月二十號

北京軍務處大臣。接各省督撫電傳。詢問俄羅斯。是否已據旅順及政府之意。究竟膠事作何布置。旋經回電。謂讓占旅順一事。實出萬不得已之舉。因俄法等國皆蓄心謀占遼東直隸一帶沿海口岸。稍一疎忽。即伺隙而動。與其將來有非理之舉。何如善於讓出為愈。前數年與俄訂言。亦即此意。北中國每日報西一月十三號

本月四號。俄國運兵船。由俄登薩新加坡長崎行抵務拉的倭斯託克。載有製造鐵路工料五千噸。並有將軍車查哥夫督率武弁多員。及武弁家眷。又可薩克兵八百五十名。以為巡查滿洲鐵路之用。聞此等兵。均向在中亞細亞當差。甚為強壯。調選

來此。每日俸一羅布。不折不扣。飯食在外。將來鐵路推廣之後。尚須續派。因其不獨

巡查。且可開仗。北中國每日報西一月十二號

上海官場接到滿洲來函。謂俄兵一萬名。已到吉林省邊界。因此吉林將軍。與齊齊

哈爾副都統。均甚為驚惶。聞副都統已奏請在黑龍江招募旗兵二萬名。應需軍械

藥彈各物。即由盛京吉林等機器局承備。北中國每日報西正月十九號

據齊齊哈爾專電云。漠河來信。謂俄國現有馬砲步兵多人。由各處來至黑龍江省

分。計分三隊。每隊約一萬二千名至一萬五千名不等。其中並有紅鬍匪三千名。紀

律森嚴。人馬精壯。聞俄人進據之處。中國官兵。不到五千名。北中國每日報西正月三十一號

### 記各省戒嚴事

長江水師提台黃提憲。少春。近與兩江總督劉制軍。坤一。面商願親自督率揚子江

各口兵馬。制軍業經允許。北中國每日報西一月十五號

武昌馳箋云。兩湖總督張制軍。之洞。已奉 聖旨。准其練兵三萬人。並用英人為之

教習。聞此等兵。係由江北甯波湖南三處挑選。北中國每日報西一月十五號

南京藩台。遵奉廷寄。已於江甯鎮。江採辦木料。合銀十五萬兩之多。為堵塞揚子江

一帶口岸之需。並聞南京正在添募營兵。意欲募足十營。每營約兵五百名。太晤士報西一月十五號

月五號

廣東來函云。黑旗劉永福應兩粵總督譚制軍鍾麟之聘。已乘圖南輪船行抵省城。

初意譚制軍欲派伊一緊要差使。而劉未肯即來。聞劉意如果出山。須許以二事。一

在廣東招募。一應任伊佈置。二須應付軍餉一千萬兩。是否一月內。即須函復。現劉

既來。大約二事。已照許矣。大略士報西一月六號

兩廣總督譚制軍鍾麟前聘請黑旗將軍劉永福來粵。據聞已令伊在海南島統領

官兵矣。從前黑旗原有之兵三千名。現亦隨來。連日劉將二十與譚制軍許巡撫密商

要公。北中國每日報西一月十九號

湖南北預備通商

兩湖總督張制軍之洞有密電致湖南巡撫陳中丞寶箴以兩湖不久即須開辦設通

商口岸。咨請多備貨船。以及料理一應運貨方便事宜。免使利權外溢。仍為西商所

奪。末節復謂。伊向來料事多中。兩湖通商之事。將來中國政府及本地紳民。斷難攔

阻。故不如力爭先著。早為地步。北中國每日報西一月十一號

長沙來電云。兩湖紳商。現擬辦運貨公司。由漢口沙市武昌宜昌。經行洞庭。直抵

長沙。船中客貨並載。以便往來。未經通商之各口岸。然此事屢議屢罷。迄未辦成。實

由輪船一通。釐金必致減色故也。北中國每日報西一月十一號

湖南通商論

湖南如開通商口岸。則中國進步。可期迅速。該省本係繁富之區。中興之際。所出名

臣不少。雖歷來頗惡西人。而人民之材力志氣。足為各省之冠。一旦開埠。俾數萬黎

庶。翕然從風。皆深知西法為可效。而一切製造之宜於該省者。即不難次第舉行。向

來英國風氣。凡始事阻梗之人。即可為後來扶助之人。湖南紳士。昔年詆毀洋人。較

之英國。實有過之。窮極則變。變則能通。此際督撫為之提倡。又安知其不幡然變計

哉。此可期者一也。兩湖總督張。日前電達湖南巡撫陳。深勸士民通埠之益。以免利

權外溢。仍為西人所奪。言簡意賅。實足令人欽佩。而各處報紙。又謂兩湖已在開辦

輪船公司。由漢口沙市武昌宜昌。經行洞庭。直達長沙。載客之外。並准載貨。雖未即

日開行。大約不為無因。可期者二也。有此二端。則督撫之意見相合。辦理自無掣肘。

而張制軍老謀深算。尤足加人一等。使各省盡能仿行。則中國富強之基。何難操券

以待哉。香港商務七日報西一月二十七號

外國時務

論英日聯盟

日本國民新報論英日聯盟一事。畧云。近來時局。以善於聯盟為第一義。英國因獨立無助。故夙昔流播東方之聲望。日見其減。俄國惟優於聯絡。故威名權力。日見其加。英勢既孤。則凡俄人一切舉動。非特無從阻止。且有不得不從之處。夫天下之人。必致同病。方能憐愛。否則即不屑引為知己。然則今日之英。似宜與日本保守在亞洲已有之權利。如英則由香港直到印度一帶屬地。日本則由臺灣直到仙台之各島。應如何設法。互相關顧。以為有備無虞之計哉。乃觀英日目前情形。似尚不然。其故何哉。英人蓄心。素視日本為霸道之邦。且恐將來精深西學。與英爭通商製造之利。故甯坐失機宜。屏絕不相關涉。日本雖日慕西國教化。然所以講求而討論者。仍在皮毛一層。非真進境。意見各分。此英日所以多猜嫌也。其用計亦左矣哉。

又云。日本效法英人之後。有謂英立國甚久。已有衰勢。有謂英國散布地球上屬地甚多。要難專注於東亞一處。有謂英之商務太廣。決不敢輕開戰事。此所以無論無事有事之秋。凡與英國聯盟者。皆能暫而不能久。此等見解。坐井觀天。本無足怪。所惜者兩國人民。皆為之錮蔽。不能稍悟耳。夫保守東方和局。莫善於聯盟。而尤莫宜於英日聯盟。使果遵而行之。則所得實多。不患無利益之可沾。惟細察目前情節。此事要非兩國政府所能辦理。其權蓋操之百姓耳。日本郵報西一月十四號

中外雜誌

中國貸款傳聞

英國國家願借中國英金一十二兆鎊。按四釐行息。此四釐中。以三釐為息。以一釐除本。合併而行。所有需索三條。一。新開通商口岸三處。二。揚子江即長江一帶之權利。概不得讓予別國。三。准緬甸鐵路推廣至雲南。以上三款。如經中國應許。凡在通商各國。皆可利益均霑。英國並無所專。想中國不難允也。北中國每日報西一月十八號

又 俄人借款。中國已經拒絕。而英人借款。中國亦尙遲疑者。因其需索太甚也。

北中國每日報西一月十七號

直隸嚴防土匪 本地官場云。現因直隸省蠢匪騷擾。經恭親王奏請。董將軍福

祥。至天津左近。統帶各營。此項營兵。皆係駐札蘆台。聶軍門士成及駐札小站袁觀

察。世凱之兵。並聞尙有甘肅帶來馬步兵各五隊。亦統歸節制。北中國每日報西一月十九號

信隆船案續聞 鎮江關現已將新福建船放行。聞此船又經信隆行租去。開駛

廣東矣。又聞有東京安南船公司東家瑪鐵。欲買武甯甯州新福建江甯四船。專候

中國與信隆行訟事了結。即須開議。北中國每日報西十二月廿九號

又 中國政府向無全權約束各省督撫。夫人而知之。此次傳諭。令將租與信隆

各船開釋。除江海關遵諭辦理。其鎮江關竟不准新福建船裝煤。託言尙未奉到放



行之論云。北中國每日報西一千八百九十八年一月四號

英艦至甯 昨日定海來函云。本月廿七號有英兵艦十一艘。駛抵此間。內七艘停於定海之東南。四艘停於普陀山脚。隨後除提督坐船久停不行外。餘船均來往游弋。惟船上兵弁。非因購辦食物水料。並無一人無故登岸。北中國每日報西十二月廿九號

舟山曾約歸英保護 一千八百四十六年。中英和約專條內。載有舟山不得讓與他國。如將來該處及近屬地。有為他國侵佔之事。英國應為保護。法國各新聞報其留意此言也可。北中國每日報西一月廿一號

英人責備沙侯 英國新聞紙有論英首相兼外部沙侯。辦理交涉之事。毫無膽量。且無定見。漸將英國所有權利。任被俄法侵占。至以開西江通商為功。然亦非十年不辦。且不周詳。此事當初應開在南甯府。並准該處製造鐵路。北中國每日報西一月二十六號

南洋英屬地幣價 新加坡來電云。商務局今日會議已定。南洋英國各屬地。應用金幣洋錢。每一元合英錢二先令。並稟懇政府。准予所請。北中國每日報西一月廿號

臺灣防法未確 前上海新聞紙謂日本在臺灣大脩防堵。以備法人。此言恐尚不確。蓋法日兩國。現尚相安。毫無事故。如真開隙。必須善為佈置。方足抵敵。北中國每日報西十二月三十一號

路透電音

英京來電。謂有將中國近耗。探之美政府者。據答割據之事。殊為非利。惟有設法保護我美國之利益而已。 太晤士報接北京訪事人來函。謂中國現將旅順砲臺。重行修築。所有工人及修費。均係俄人承墊。即此可見該口將來永為俄有矣。以上

二月廿四號 美廷現派勃音君為駐華使臣。北京消息。謂俄國某大員。請於中國總署。欲將鐵路工師及武備教習師。所用英德人。一概辭歇。改用俄人。五

號 倫敦近耗。謂英日因東方事。現已聯盟。 德國太子。見英國君主時。曾面

遞德皇所書長函一封。 德皇宣言曰。俄皇立意。與我相同。大可引為知己。廿七號

德國太子督率兵艦。行抵Gibraltar地方。當即登岸。該處總督。派兵照例款迎。

英京來信。謂俄京聖彼得堡傳說。俄人已佔金州。其地在旅順口北。廿八號

加坡專電。謂西貢來函言。法國水師提督。已佔海南。懸挂法幟。當進據時。並無有人向之抵禦。廿九號 英國海部大臣。謂英水師已抵海參崴左近。前傳言謂到仁川不確。 美新聞紙載俄與高麗。已立合同。訂明高麗海關稅司。歸俄人阿列克錫也夫承充。並一應高麗度支。亦承出俄人經手。 英國拋福新快船。今日已由新加坡往北。廿九號 高麗仁川來電。謂英國水師兵艦八艘。水雷船四艘。刻已駛

抵此間。香港來電云。據安南商家消息。謂法人占據海南之事。並不確實。而法國駐港領事。亦以此信為不確云。法國現簡調 M. Pichon 為駐華北京使臣。三十號

據法政府云。法艦在海南佔口換旗之言。並不的實。三十號 聖彼得堡來信。

謂高麗稅司阿列克錫也夫。已奉俄政府之命。深勸高廷與俄通商。屏絕別國。並欲在韓城。任俄人建立教堂一所。西一千八百九十八年一月三號 傳聞英國之意。如別國果於中。

國新得益處。英國亦當照索。以免偏枯。斷不肯袖手坐視。致失東方權勢。五號 英

廷深願借款於中。故現中國政府。正在商議。德太子已在波賽。印度某

國世子。名 Prince Victor Duleep Singh 已娶英國伯爵哥分特之女為室。英京來

電云。德國柏靈都城官場傳言。中國已允將膠地。租與德國若干方英里。並准予德

人建房屋設防守一應全權。如德人以膠州為不合於用。尚可商議別換口岸。

有請英政府借款扶助中朝者。英政府甚以為然。太晤士報論英廷並無意與

各國剖分中土。惟欲扶助中國。以為保護商務之計。緣中國係商務繁盛之地。自前

開蘇彝士河後。商務日見起色。此次用意。正是相同。太晤士報得有消息。謂中

政府已允膠州租與德國九十九年。故德國擬於是處開一銀行分支。六號 倫敦

銀行傳聞。謂不久即須開辦中國借款之事。照一百一十之價。每年三釐起息。

法國報論此次德人佔膠。實為前年幫助中國。收回遼東之地。應有酬勞。香港

來電云。英日聯盟。係保守中。高自主之權。七號 加拿大預備兵局。現已收有許多

投効之信。如果東方有事。咸願出力。駐北京訪事人來信。謂俄欲借款於中。中

國拒而不納。八號 香港發來專電。謂英俄日三國。通已議妥聯盟。英國水師。業已

南旋。中國新貸某處借款。係英國居間擔保。九號 法國現派兵艦一艘。開赴

東方。外間傳言。英廷願逕直借款於中。由英出票。故英政府咨請議院。照此辦

理。又云。俄人借款與中國之事。不能有成。因德人之意。欲令俄國允許各國富

商皆能出款附借。否則即為梗阻。十一號 日本新政府名單。開列於後。總理

大臣侯爵伊藤博文。外務大臣男爵西德二郎。內務大臣子爵芳川顯正。陸軍大臣

子爵桂太郎。海軍大臣侯爵西鄉從道。大藏大臣伯爵井上馨。遞信大臣男爵末松

謙澄。文部大臣侯爵西園寺公望。司法大臣曾根荒助。農商務大臣男爵伊東美代

沉。此電所載官秩姓氏。已向日本駐滬領事署詢問。均係確實。合為附注。十二號 近來德國新聞紙。凡有論說。關涉

英國者。似較前和睦。英國借款之事。遲遲未成。實因中國並不著緊辦理。且有

許多為難之處。而以何款作抵。及能否可靠。尚在未定。德廷現向本國商家

租定商船二艘。以便裝運。十三號 英京傳言。謂英廷現願借銀若干。以與中國

惟須允以三事一續開通商三口內二處係南甯及大連灣一長江一帶此後永遠不假權與別國三緬甸鐵路須通至雲南聞中朝似有允意經俄法兩使臣竭力阻止英戶部尚書宣言曰英國並不欲割據中國土地不過開關口岸以爲通商計耳此事我英國一定照行即萬不得已從事干戈亦所不顧十九號英新聞紙聞昨日戶部所言之言甚爲嘉許竭力懲惡二十號英戶部尚書又宣曰本國今年預算報銷須爲多添水兵地步以免落於人後如果中國借款之事不成我國卽當按遵條約應有之權辦理俄國之意以爲別國如在大連灣開設口岸俄人卽須索賠二十一號聖彼得堡來信云駐泊旅順口之英國水師現因俄人不允故已奉命他往矣法國又派兵艦二艘來華二十二號英水師開赴大連灣隨後又至別口游歷均屬和平舉動並不關涉俄人太晤士報載德人欲於膠地開立通商口岸與現香港相同廿五號英新聞紙謂各國並無意瓜分中土所有傳言各節俱係誤會德國外務大臣宣言以爲此後膠地之事須彼此公平辦理庶中德兩不受虧得以相安無事意大利國亦派一兵艦來華廿六號傳聞俄皇與本國武官數員議論東方之事俄皇甚爲關切且頗煩惱又以日本目下情形尤爲掣肘今已設法辦理可期安枕無虞矣廿八號

俄文報譯

上海李家鏊譯

論日本近時武備

譯海參崴七日報俄八月廿一號

某君論日本新政云一千八百九十四五年中日戰後立約過偏使歐洲各國不得不出爲限止日本畏於兵力始肯俯從遂不敢揚揚得意稍事悔抑如當頭喝轉迷爲醒從此君民合力整頓武備業將水陸擬辦章程發交議院謂水師宜大加添置必使冠於太平洋而後已陸軍宜堅守海口使敵者不得登陸爲度兵艦軍火宜從新制雖巨款難支亦必從長計議不使稍遜於強鄰稍缺乎利器政府煞費心機安籌良策猶恐議院爲難首先引出比較多端以期事必有成所引者皆關於大局最新最要之政實爲日本當務之急其上者如保護屬地生活移民墾荒擴充製造土貨整頓商務利益諸大端庶與歐洲在東方有心之國指俄國也相埒蓋該國近來在東方年年長進頗有蒸蒸日上之勢每與日本爭衡故也次者如保護日本人之貿易於高麗臺灣澎湖各埠者必使日漸長進不失利權爲本再次者如日本人流寓美國檀香山及新金山各埠之受辱於英美各國者必使轉辱爲榮轉損爲益勿再受外人欺侮爲率以上各端亦不外以添增兵力爲本議院咸悉其中要害業已議准數款一添增水師二擴充陸軍三增修礮臺需款甚大准其動用中國借款大半云

云。按日本如此舉動。所患者惟俄國耳。蓋俄國逼近日本。日本仇視俄國。俄國能不力加整頓。東方要政。添備陸軍。整飭水師。以迎日本乎。日本彈丸小國。竟敢與大俄爭雄。我為日本憂焉。恐不待患及俄國之日。必將自斃而後已。窺日本所增兵備。悉賴中國債款開支。並無別項的款。又無洋債可借。焉能久持乎。如千八百七十一年普法之戰。法償於德為數尤大。而德國不但富反覺日富。若論借外債一說。日本不但不如義奧比及歐洲各國。且不如土耳其。其窮國矣。若及早回頭。安分守己。猶恐未必即能自強。尚敢揚揚自得乎。若論日本現有陸軍。自守尚嫌不足。何足以言出戰。若論水師規模。保商或可。戰守甚難。水陸各軍。一無可取。既不准軍律。又不知忠義。將何恃之。由中日之戰。已畢露其不足恃之一端。何猶自鳴得意。而不知自愧耶。論日本防務。水陸均畧有可觀。然防陸不如防海。蓋日本地居三島。四面環海。雖節節設防。頗難周密。非輔以鐵路不可。彼政府有鑒於此。早已密加布置。如通國全體且備之。陸軍。西人練兵。以通國所有之兵為一軍。歸兵部節制。取其骨節靈通。如四肢之於一身。心之所主。無不相應。不若他國之分疆畫界。一有軍務。彼此掣肘。諸多未便者也。水師全軍。水師防守邊防。礮臺。運兵鐵路。無一不備。茲將日本一千八百九十六年正月。即光緒二十二年春月。所有之兵額等項。及擬增之水陸各防錄左。擬增之水師。限十年竣工。以一千九百零六年正月為限。陸軍自必從速。惜不知其究竟耳。陸軍悉仿德制。分四類。一曰正兵。常川駐營。日習武備。有事即發者也。二曰副兵。平時不備足額。戰時調為後勁。或立新軍。或為守禦者也。三曰備兵。係當正兵後。遣散歸籍。俟有軍務時。補額之用。平時各安生業。奉調即應。不得推諉者也。按其軍械。衣裝。全備。惟衣式稍異。有事給發。年齒不一。所備之衣。稍寬大。所用軍械。隨時更易。本難預定。西例遇征戰時。非戎衣而持械。遇敵者。敵人不以兵相待。而以亂民相待。可隨便誅殺。有戎裝則敵人不待妄殺。故視戎裝特重。亦恤兵之一端也。四曰守兵。義主護國。遇有大患。國勢將危。經兵部告急於律部。請旨調遣。第一班出隊捍禦。勢若再迫。由君主下哀痛之詔。第二班自行投任。不待調遣者也。故或名之曰義兵。

日本籤兵之法。亦仿德制。每年挑選及丁之民。入籍當兵。常川駐營。三年為正兵。三年之後。遣散各歸本業。歸入副兵之冊。四年調操。若干日。四年之後。歸入備兵之冊。五年。其中亦須調操數次。五年之後。則歸入守兵。或義兵之冊。至四十五歲為止。間亦調操數次。實則虛行故事耳。然則日本民籍。四十五歲以外。始出兵籍。得以自由。或有自願充兵者。不過終身為弁而已。總不能由弁升官。蓋戰官弁之學。判為兩途也。日本通國陸兵。原分為七軍。或曰七省。實則祇西國七翼耳。計自一千八百九十五年。軍興加額以後。改為十二軍。軍務以前。每軍統轄七翼。第一翼駐紮東京。為內禁侍衛軍。其餘六翼。駐紮外省。為全體軍。每翼計步兵四協。每協三營。惟禁衛軍。馬兵。一協。工兵。一營。砲隊。三十六尊。茲將所駐各埠錄左。計禁衛軍一翼。及全體軍第

一翼駐紮東京第二翼駐紮仙台第三翼駐紮名古屋第四翼駐紮大阪第五翼駐紮廣島第六翼駐紮熊本其餘新添之六翼暫時分駐以上各埠聞將分駐小倉九州札幌松前宏前金澤福山丸龜四國各埠云

茲將常川駐營之兵額錄左計禁衛一翼兵額八千人全體軍第一翼額兵九千二百人全體軍第二三四五翼每翼額兵八千三百人第六翼額兵九千人

連對馬島所駐之另隊此外尚有駐紮外藩屬島各埠之兵四千人巡捕隊一千一百人

專指武營巡捕歸內部管轄不入兵籍以上所按兵額內分步馬砲工程各類計步兵五萬人馬兵三萬六千人砲兵六千二百人工程兵二千六百人運糧兵二千四百人巡捕兵一千一百人

不入隊之長夫五百人共計正兵六萬六千人副兵九萬人備兵十九萬人統共三十四萬六千人

茲將軍務時加額之數錄左計正兵十二萬人副兵十七萬人備兵二十萬人統共四十九萬人

惟守兵一項不入此數蓋守兵非軍務緊要國勢將危不先預備者也

以上所錄之數皆計日可以成軍之兵也

日本全體陸軍所備之步馬各鎗皆係新式八响快鎗名穆拉他者其鎗子較之俄國現備之五响小口徑快鎗子彈畧大命中較遠所有鎗砲均由本國製造不必借重於歐洲各國如東京大阪神戶製造局均有可觀各該處糧臺軍餉水雷各局亦甚足備一有軍務立刻出運所有兵部分出各局所行營不但咸通鐵路且備有起陸路機器靈捷妥當不可言喻工部鐵路股亦與兵部相輔每一令下一周時可出火車三十六輛先儘兵部調遣其餘如馬匹車輛亦皆足備所有民間馬匹咸歸兵籍有事即調不至有所耽延也

日本鐵路內自緊要用兵各埠外至沿邊沿海設防之所布置周密美不勝收如日本全島從小樽至松前達長崎通熊本

其中惟馬關與大里一水之隔不通而已

其支路則或南或北無不四通八達用兵之埠如佐世保橫須賀舞鶴中仙道四日市商務之埠如

新瀨水戶空知松前此處有煤礦支路無不聯為一氣其中土全島最要之路係由青森直達馬關其中支路如仙台東京橫濱橫須賀神戶大坂京都名古屋廣島馬關如脈絡相通用兵通商誰曰不宜

日本電報除鐵路所經之處商務用兵之處接通陸線外尚通水線如高麗臺灣對馬島千島均可傳達殊為美善

日本建設礮臺不為不密如北海道以室蘭

在北海道

為門戶前已築有礮臺近於箱館

在北海道

亦行添設以為東口屏蔽

其中土全島

西人或名之日本島

以東京為國都東京灣兩岸皆有臺壘以橫須賀

在中土為相摸國

拱衛神京之礮臺以舞鶴在中土神戶為中土西偏濱海之東西門戶馬關在中土為中土西偏濱海之東西門戶海峽在中土為西海口門戶均已建設礮臺其餘如鳥羽在中土敦賀及東京之北海口礮臺均將逐漸添設至於回國九洲緊要海口礮臺亦無不備其九洲島則止有佐世保長崎均屬肥前國對馬島屬九洲島在日各處礮臺其南口之鹿兒島在薩摩礮臺亦不日興築

日本水師效驗較速布置尤密直有蒸蒸日上之勢凡護商水師商船水師西國凡船公司國家必出巨資以助其成所置船隻均照水師兵艦式樣國家為之備設砲位存儲水師軍械所軍令一下不論何項商船咸歸海部調遣安置砲位或充運船或充練船近來俄法各國竟有以鐵甲船充商船者如俄國義軍公司所造之船皆每艦約價一二百萬羅布所有該公司員役挑取水師額之員丁充當蓋欲其久歷戎行諳練風水陸船塢海軍糧臺軍火廠局帆纜船隻水師學校製造學堂無不濶一舉兩得也美備即以兵艦而論率由本國廠局自製價廉物美凡欲以人勝天者也惟艦中應用各物雖稱足備不甚堅實然亦皆取於國中無待外求其勵精圖治之心非一日矣若他國之專備兵艦一無布置雖船甲礮堅亦難堪血戰即有背城借一偶爾嘗試不論其勝負何若皆難復戰此等水師恃之運傷兵添軍火增糧食運替兵尚不能按期如願何暇談乎與敵人角勝負也此等情形應歸咎於天下水師最强之英國員弁教練然隣國亦出於英人教授何布置之如斯周密進益之如斯捷速不數

十年竟能不事倚傍措置裕如此中利益不待智者而知焉

日本商務之進境令人意料所不到近十年來更有可觀如中國通商城鎮高麗各埠南洋之新金山美國之各海口歐洲之法國英國德國各埠及日本本國屬地臺灣琉球千島無不行銷日本之貨其出口貨之大宗為絲茶查美國一處每年消日本絲綢一十四兆銀元茶葉五煤炭乾魚查西國視鹽魚之利為一大宗沿邊沿海各分疆界派兵輪看守兆銀元煤炭乾魚不得越雷池一步獨我中國不求此利反有禁止出口之禁與西國適復草木竹漆玻璃各器具洋火玻璃片烟絲呢羽布疋查布疋近來祇銷中國高麗及日本屬島歐美亞各洲則因貨及棉紙等貨進口貨之大宗為鋼鐵機器米糧樹木洋酒及歐美兩洲所產之貨而已至運貨商船公司之進境更為捷速如西曆一千八百七十年時即華同祇有三菱公司一家現在則有日本郵船會社公司大坂朝鮮會社公司東治十年祇有三菱公司一家不一而足但以三菱公司一家而論已有大小輪船七十五艘共計載重一十五萬五千噸其興旺亦可概見總論日本通國河海商務祇通商各埠小樽室蘭橫濱神戶長崎箱館准歐人貿易外其餘內地各埠利權皆在本國布置亦甚周密如海灣港口屯煤泊船之處無不妥便國居新舊土地西人稱洲為舊地美洲為新地之間收盡五洲通商之利天時誘其衷人事盡其力為其隣者能不深為羨慕乎近來日本新定章程一則嗣後凡有公司於本國船廠定造船隻國家必

加以獎賞。每噸載重得賞二萬五千銀元。亦裁漏卮之一端。故公私船廠。日見興旺。計其現有船廠之埠。有八。曰東京。曰橫須賀。曰大坂。曰神戶。曰長崎。曰吳鎮。曰小野濱。曰石川。有船塢之埠。一十有二。曰橫須賀。曰長崎。曰佐世保。曰吳鎮。曰東京。曰大坂。曰橫濱。曰舞鶴。曰新瀉。現造未成曰箱館。現造未成曰小野濱。曰石川。有商務廠作之埠。一十有四。曰橫濱。曰長崎。曰神戶。曰莫船。曰大坂。曰箱館。曰室蘭。曰口之津。曰東京。曰小樽。曰敦賀。曰新瀉。曰鹿兒島。曰靜岡。此但指著名者而言也。然則日本商務之盛。亦可見一斑。有此海利。有此商務。非益以全盛之水師。不足以資保護。日本政府。有鑒於此。盡力整頓。茲將西歷一千八百九十六年正月一號以前所有之水師兵艦列左。

鐵甲戰艦六艘。雖皆歐洲老式者。然購自美國。價廉物美。

頭等二等快船十艘。皆歐洲新式快船。配有快砲者。適稱及時戰艦之用。

三等快船五艘。

穹甲師船七艘。

巡船六艘。

魚雷獵艇三艘。

練船運船十艘。

頭等二等魚雷艇四十五艘。

以上共計大小戰船九十二艘。分駐橫須賀。佐世保。吳鎮。舞鶴。室蘭各海口。皆有駐陸水師提督。按西國水師章程。分水師提督為兩類。一專駐海口。一專駐戰艦統領水師全軍。在焉。設水師營務

處。為之提調。船塢船廠機器廠軍械局糧臺。以資接應。其中以橫須賀為頭等海口。布置最密。儲備最足。即軍械局一項。冠於通國海口。查西歷一千八百九十六年。擴充水師章程。除盡力添置戰艦未計外。增修五海口水師各局廠。亦甚可觀。如船塢船廠。機器廠。軍械局。礮臺各工程。皆次第添設。其佐世保。吳鎮兩處工程。則業將告竣。而室蘭。聞尚未大定。或將另擇北海道要口設防云。舞鶴兩處。則甫定圖稿。將次開工。論其現有船塢之敦賀。四日市。莫船。佐世保。舞鶴各馬頭。布置亦甚周密。每處必有水陸防兵。及兵房庫房軍械所馬頭。起卸各局所。專備轉運軍火之需。即廣學各局會所。亦皆精進。武備水師輔相表裏其間。可謂盡善盡美矣。若論製造槍礮各廠。則東京。吳鎮。大坂各局為最也。

日本擴充海軍章程。已於西歷一千八百九十六年正月一號。經議政院議准。茲將其業已定造各艦列左。

頭等鐵甲戰艦六艘。三艦已成。三艦不日下水。皆仿英國最新之利挪馬吉司担局泊託爾式樣。

全船喫水載重每艦自一萬一千五百噸至一萬四千八百噸。

新式快船九艘。兩艘已成。七艘定造。仿英國育赤諾伊特格爾握倫姆盼式樣。全船喫水載重

三千二百至七千八百噸。

魚雷獵艇三艘。全船喫水載重一千二百噸。  
魚雷碰船十一艘。

魚雷運船一艘。仿英國地中海水師中之握爾開式樣。  
頭二等魚雷艇八十九艘。

以上所定大小戰艦一百一十九艘。限於一千九百零六年正月一號完工。其中三分之一定於英德美三國三分之一。由本國船廠自製。十年之後。日本水師將自由於東海。為其敵者。能不懼乎。

中德軍務彙記

譯俄國東方報 俄十一月廿六

接德都柏林來電云。德國續派水師駐陸步兵六百名。赴東亞細亞以備水師調遣。  
接英都倫敦來電云。泰晤士報館據上海電報稱。中國國家擬請三大國。出為調停。德國所欲遲志於中國之事。

接柏林來電云。德國北方稱德國國家派水師步兵一營。計兵官二十三員。兵水師  
礮兵一隊。計兵官四員。帶有快礮過山礮若干尊。赴東亞細亞。  
兵丁二百名。

議膠州兵事

譯俄國東方報 俄十一月廿三號

據日本新聞紙稱。歐洲各國自中歷十一月初一至初五日。即俄歷十一月十二至

十八號。與日本報館各電報。皆稱德國有必欲佔據膠州之意。

德國取償於中國。其款有四。一索焚毀教堂鉅款。二令中國懲辦地方官員。三攬造  
山東鐵路。四索取膠州口岸屯煤。其初中國令先退膠州之兵。方與議款。嗣德國不  
肯退兵。中國亦無如之何。聞業經開議。所議如何。不可得而知。

德國國家已派耿親王於中歷十一月十七日。即俄歷十一月廿八號。由德國前赴  
東方。統領水師。聞是日並派步兵一千四百名。砲隊若干名。帶有快砲過山砲若干  
尊。

中歷十一月初六日。接廈門電報。日本在臺灣。甚為惶恐。已將兵設法展布。現又日  
益籌畫。並聞日本有若干兵船。運兵前往臺灣。已在半途。而日本國家猶以為不足。  
尙欲議添也。

東方報云。自從德國佔據膠州而後。海參崴之人。議論紛紛。以為意料所不到之事。  
而瓜分東亞細亞之語。則眾口一詞。本館既有所聞。不得不書之於報。但膠州之事。  
不過稍露其端倪耳。而歐洲各國有心於太平洋者。其胸中當早有成算。或英法俄三  
國與聞其事。亦未可知。但俄國之志。當不在圖謀中國。而在輔翼高麗也。  
以上各節。皆英國路透報館經理人發遞中國日本各處之消息也。



其最詳而尙類於眞實之報則中歷十一月初四日即俄歷十一月十七號由倫敦發來者茲特附錄於左

該報云俄國整頓高麗之事如歐洲各國不出爲干預則膠州之事俄國亦不願與聞也

其最爲可笑之報則中歷十一月初三日即俄歷十一月十六號由上海發來者茲特附錄於左

該報云此處已得有俄法德三國商議瓜分東亞細亞消息其瓜分之法則俄國於得高麗之外益之以中國北邊各地德國得山東一省法國得臺灣福建兩省之外尙欲襲取北京

此等之報不特他國不肯相信即英國人亦不能自信中歷十一月十六日即俄歷十一月二十七號長崎英報亦甚斥該報之不實也其斥之之語謂必非瓜分東亞細亞或者係分畫各省地段而各國得以行其利權而已

以上所有各報據本館觀之卽有瓜分之事則北京應分與俄國而今則分與法國卽可知其言之不實至於臺灣一節如以俄日肇衅法國出而相助則臺灣分與法國其詞或近於理究之此皆道聽塗說之言閱報者幸勿泥以爲實也

第十五章

第一款凡屬合衆國之民皆准一律舉官不得以種類不同皮色各異或因其昔日微賤爲奴遂不准其舉官或減少其舉官之權

按第十四章第二款用意在黑士人數乃南邦卒不願黑人舉官國會恐黑人不能一律自主故再增此款欲舉國二十一歲之男丁皆得一律舉官也

第二款國會立例以行前款之意

此章於一千八百七十年三月三十日增立

完

時務報館譯編續集

克鹿卜廠製造錫鋼甲板說

德國克馳馬譯

英正月三十一號閱英國第二千零九十二號之機器博學新聞紙內有一段講論一千八百九十四年及一千八百九十五年試用克廠甲板證據其板堅固非常別國不能仿造此語係英國人注明於英國新聞紙內似此公正實據足見克廠所造之板決無草率因新聞紙所敘太長擇其緊要之件陳明列後

英國人已由克廠得取試用甲板相片實據按此相片考驗克廠所造錫鋼甲板工作極妙我國不能仿造也除英國之外別國亦有仿造者即如沙漠廠及美國各廠所造甲板情形尚好無奈砂眼泡斑太多惟克廠總無此弊於一千八百九十四年十二月十五十七兩號又一千八百九十五年三月十五十六兩號有德國官在克廠閱看試驗甲板力量先以一塊煉硬錫鋼甲板長八尺十一寸一分寬四尺十一寸厚五寸七分半重四噸半用十五生特即英尺五寸七分口徑又二十一生特即英尺八寸口徑以鋼實心子試放五出該甲板之擋力甚好假如子彈能穿煉硬鋼甲板一寸深即能穿熟鐵板一寸七分深又有甲板一塊其大小尺寸與前相同惟重四噸零一千六百八十磅所試驗情形比前較好內有一出子彈撞擊甚猛其力有七千

四百二十四尺噸或一千五百八十四尺噸每噸如甲板重此係最烈非常之試驗也。因平時試驗祇有五六十尺噸每噸如甲板重。又試驗煉硬鑄鋼甲板一塊長六尺六寸七分寬五尺十寸七分厚十一寸七分重七噸零一千八百五十九磅二兩。試驗三出子彈未能穿透擊為粉碎。若子彈能穿透熟鐵板二尺四寸深即能穿鋼板四尺一寸深其擊力甚猛有一萬一千五百尺噸或一千四百六十九尺噸每噸如甲板重內有一出擊中甲板左邊顯有裂痕兩條雖然如此甲板柔硬之力尚存實為異常之美。又有極堅固之甲板一塊長九尺十寸寬六尺二分半厚十一寸五分半重十三噸零五百六十磅。試驗三出未能穿透甲板已為粉碎。第三出雖擊震之力甚猛并無裂痕堅固異常。蓋甲板較厚兼以料質甚佳者不易製造。以揣此種試驗現又考驗無煉硬之鑄鋼甲板長八尺六寸四分寬五尺十一寸三分厚六寸一分重五噸零六百八十三磅二兩用十二生特十五生特及二十一生特。試驗放十出共擊力有一萬六千一百十三尺噸。甲板毫無裂痕孔邊捲出其色更見異常之好。雖鋼甲板未加煉硬亦能擋三千一百十三尺噸。每噸如甲板重該甲板料質最佳極其堅固能受至大擊力。若子彈能穿透十寸厚熟鐵板或八寸厚平常鋼板又能穿十一寸四分厚熟鐵板或九寸一分厚鋼板。然六寸一分厚無煉硬之鋼板。

雖子彈擊入尚未能穿透此種鋼板作陸路臺廠之廠罩最好能擋子彈擊力又能用以製造鋼甲船。因此德國水師官愛其美質喜不自勝。以上係英法兩國新聞紙讚論克廠製造甲板情形。而德國新聞紙亦然。美國所造者皆不及克廠。此所論試驗甲板業經年餘至今克廠仍不斷加工細造精益求精。故各國諸廠惟克廠為首。如欲購買戰船最要者務須揀選定用甲板以免受子彈穿透之患也。

談瀛館隨筆 續前稿

順德譚培森輯譯

### 渡海德律風

美國新這塞地方德律風公司總辦威靈厄杰創造渡海德律風。曾在本處地方試驗確見功效。其驗法用鋼線引電。外包以銅。在本局透至郊外二英里之遙。另置一局。該鋼線橫臥地上。蓋以冰雪泥土。又線至半途有一小溪湍流甚急。線從水裏穿過。於是兩局傳聲。嘖嘖清楚。實與現用飛簷陸路德律風無異。厄杰語人曰。由此推之。可以渡海矣。有電學名家在場觀看。目擊其妙。亦皆曰然。

### 聾啞律師

格拉特。美國之加釐福尼阿省人。生而啞耳。又重聽。惟性甚敏。自幼從學本省之聾啞學堂。聰明慧悟。超越羣儕。年長棄書讀律。期滿出考。居然得律師銜。例准操業問

世但格拉特未能解語。祇可意會。而不可言傳。所有辦理一切訟事。均藉管城子爲力云。按例以美國爲最寬。凡人有一藝一能。無論男女殘疾。均予以操業之權。在歐洲各國例則較嚴。非獨聾啞之人。禁當律師。即女子亦不准。法國有閨秀。名瑣詠者。貫通律學。在各書院考試。歷拔前茅。而法官終不准其代人理訟。至今憐其才者。均爲抱不平。

### 鐵路電機

西人奚文。新創鐵路電機。曾在巴黎西方鐵路試演。每點鐘平行能走一百啟羅邁。當之遠。若快行則能走至一百二十啟羅邁。當該電機能容水至三十噸。比之現用汽機。多容水三倍。既無沿途添水之費。事失時。又疾行過半。將見電掣風馳。瞬息千里矣。該電機工作材料。共值銀二十萬佛郎。

### 美洲產金銀總數

理財家言。天下金銀之盛。自西人覓出阿墨利加洲始。考墨洲開拓之初。一百年。明治中至萬曆末年所採金銀。共值一百一十五兆元。再後一百年。又得一百九十三兆元。及由一千八百零一年。至一千八百五十年。墨洲所出金銀。共值二百二十七兆元。由一千八百五十一年。至一千八百七十五年。墨洲每年所產。約在九百三十兆元。由

一千八百七十五年。至一千八百八十五年。每年多產至一千零九十兆元之譜。由一千八百八十六年。至一千八百九十年。每年竟產至一千三百四十兆元。由一千八百九十一年。至一千八百九十六年。每年居然產至一千九百七十五兆元。由墨洲開墾以來。四百有餘歲。所產金銀。共值一十萬二千兆元。內金凡四萬六千兆元。銀凡五萬六千兆元。

### 石煤原始

比利時國。擬本年釀資。倡建慶賀石煤出世七百年大會。據說一千一百九十七年。南宋慶元三年比國柴價炭價驟長。有鐵匠名滬里阿者。設肆於里治地方。一日爐中炭盡。無力購買。偶從土中檢得石煤數塊。意可代炭。試放爐中。居然生火。於是遍傳隣里。漸及遐邇。通國之人。皆云石煤之有用。當時僉呼之爲烏也。照字而譯之。石炭也。一千二百二十八年。南宋紹定元年里治大開石煤之礦。至一千三百四十年。元至元年石煤始傳入英國。當時燒石煤之家。必先由官領取准照。方可購用。蓋謂石煤之烟。足以致人受病云。

### 晏納基黨

晏納基黨。或譯作無君黨。蓋其立黨之意。欲使國無君上。人人得以自由也。其立黨

之始末事遠不可考。祇記一千八百六十四年。同治該黨人集各國之羽翼。大會於倫敦。當眾宣揚該黨道理。然後天下方知有此黨。以前事同私會。外人不可得而聞也。其黨人明目張膽。所行不法之事甚多。茲舉數端。可見一斑。一千八百七十九年。黨人謀弑意王未成。越年弑俄王。又弑西班牙王。兩俱未成。越年弑俄王。俄王死。一千八百八十四年。謀弑德王。事敗。查獲黨人三名。就地正法。同黨歸咎於警察官殺之以雪黨忿。一千八百九十三年。在巴提洛納地方。以炸藥焚其書院。傷斃多人。越年法總統伽儼。被該黨弑死。一千八百九十六年。巴提洛納地方。迎神賽會。行至半途。地雷暴發。轟斃男婦二十餘人。皆無君黨人之所為也。今年曾弑意王未成。而竟刺西班牙相馬。此亦有幸有不幸也。

### 英國郵政

郵政辦理之善。雁帛往來之多。歐洲羣推英國。據英國郵政總辦。日前所刊清冊。計自去年西三月三十一號起。至本年西三月三十一號止。經該國各局傳遞之信。共一千八百九十三兆封。又新報印件及信單等。共三千零四十兆起。代滙銀信共值英金七十八萬鎊。約合華銀六百二十四萬兩。是年所收發電報。共七十九兆五十萬封。比之上年多一百萬封有零。

大同譯書局將已刻及譯出之書價目列後。本局在上海泥城橋西第四家。如有欲購書者。請專函付到。當可如期寄上。

南海先生五上書記 一角 是書丁酉冬南海先生因膠變而上者。約萬餘言。其中指陳時事之不可

為言保守之要道。比之前四上書更為痛切。明白刊之以餉天下之有志斯世者。

上古茫昧無稽考 周末諸子並起創教考 諸子創教改制考 諸子改制託古考 諸子

爭教互攻考 墨老弟子後學考表附 儒教為孔子所創考 孔子為制法之王考 孔子

創儒教改制考 六經皆孔子改制所作考 孔子改制託古考 孔子改制法堯舜文王考

孔子改制弟子時人據舊制問難考 諸子攻儒考 墨老攻儒尤盛考 儒墨交攻考

儒攻諸子考 儒墨最盛並稱考 魯國全從儒教考 儒教徧傳天下戰國秦漢時尤盛考

武帝後儒教一統考 共二十一種定價銀二元 此書為南海康長素先生所著。判中國

四千年之教案。明孔子為生民未有之教主。創儒為國號。託古為前。駁稱王為制法。禮義制度

皆出孔子。舉天下萬國有飲食人倫。莫不範圍於孔子之教中。而受孔子之澤。一一考其實蹟

得其真源。中國二千年第一部教書也。學者得而讀之。如撥雲霧。見青天。知孔子之功與天地

並。而孔子之道大明於天下矣。

春秋董氏學南海康長素先生著 一元五角 孔子微言大義。傳於口說。至董子盡發之。蓋漢儒惟董子最醇。傳

道最備。惜靈翳千年。殘闕至不可句讀。而孔子之道遂隘。是書大發明之。其天人陰陽之故。推闡無遺矣。

有志斯道者不可忽也

春秋中國夷狄辨三水徐勤著 二角 從來言中國夷狄皆以其地徐君獨本春秋之義視其合禮義與否

從而名之作辨以破千古之惑學者當此時尤不可不熟明此義也

瑞士變政記 一角 此書乃紀瑞士變政之局由野蠻而進文明其立國於元至我 國初遂為歐洲太平之國至今稱為樂土不患干戈雖美英法德皆望塵不及故先譯此書後再譯美英法德諸變政記也  
俄土戰紀 四角 此書專紀光緒初俄欲滅土設計使土與人戰以開其釁已乘其敝以見俄之險心狡詐土之苛虐苟安各國交涉權術無不歷歷曲盡甚若今日在東方措置情形誠外交之要書也

意大利興國俠士傳 一角 記意國俠士鎮定國中大亂以致中興十餘人皆各有傳傳中序其生平行事皆我中國人可對鏡而觀也

經世新編順德麥仲華輯 三元 大地日通新理日出大易垂訓義在變通故此書所選若郵運會黨民政政黨學術官制法律等類取其新民新國不因襲魏葛二編之舊而外邦著述取其發明新理新法者附見之吾上下能取此編而推闡之亦自強之基也

知新報館告白 本報戊戌年全年先收報費銀四元閏月照加仍舊托時務報各代派處代派上海則附大同譯書局如有欲閱本報者請專函示便可寄去

